

REGLUGERÐ KSÍ

um aga- og úrskurðarmál

I. kafli. ALMENN ÁKVÆÐI

1. gr.

Gildissvið

- 1.1. Reglugerð þessi er sett með stoð í 30. grein laga Knattspyrnusambands Íslands og samkvæmt agareglum FIFA (FIFA Disciplinary Code). Hún gildir um öll aga- og úrskurðarmál innan vébanda KSÍ nema mál séu sérstaklega falið öðrum úrskurðaraðilum samkvæmt lögum og reglugerðum KSÍ.

2. gr.

Markmið

- 2.1. Markmið reglugerðarinnar er að tryggja skýrar og afmarkaðar reglur um aga- og úrskurðarmál KSÍ. Markmið hennar er einnig að sameina öll þau mál er upp koma innan KSÍ er varða agamál, sem aganefnd KSÍ fjallaði um áður, og kærur sem dómstóll KSÍ fjallaði um sem fyrsta dómstig, undir einn og sama úrskurðaraðilann, aga- og úrskurðarnefnd KSÍ.

3. gr.

Lögsaga og hlutverk

- 3.1. Aga- og úrskurðarnefnd KSÍ skal hafa fullnaðarlögsögu yfir þeim málefnum, sem koma upp innan vébanda Knattspyrnusambands Íslands og varða lög og reglur þess eftir því sem við á. Nefndin skal byggja niðurstöður sínar á lögum og reglugerðum KSÍ. Skulu öll aga- og úrskurðarmál innan vébanda KSÍ rekin fyrir aga- og úrskurðarnefnd KSÍ nema þau séu sérstaklega falin öðrum úrskurðaraðilum lögum og reglugerðum KSÍ.
- 3.2. Aga- og úrskurðarnefnd KSÍ úrskurðar í öllum agamálum KSÍ og er jafnframt fyrsta dómstig í kærumálum, sem upp koma innan knattspyrnuhreyfingarinnar. Meginhlutverk nefndarinnar er þannig tvíþætt, annars vegar agamál og hins vegar úrskurðaraðili á fyrsta dómstigi og ráðast málsmeðferðarreglur nokkuð eftir þessari skiptingu.
- 3.3. Nefndin getur tekið ákvörðun um viðurlög samkvæmt lögum KSÍ, reglugerð þessarri og öðrum reglugerðum KSÍ gagnvart aðildarfélögum, forráðamönnum, leikmönnum, þjálfurum, starfsmönnum, umboðsmönnum og öðrum þeim, sem eru innan vébanda aðildarfélaga Knattspyrnusambands Íslands vegna brota þeirra á lögum KSÍ, reglugerðum KSÍ og öðrum reglum.
- 3.4. Nefndin hefur aðsetur á skrifstofu Knattspyrnusambands Íslands, Laugardalsvelli, 104 Reykjavík og skal KSÍ tilkynna án tafar allar breytingar sem verða á skipan nefndarinnar eða aðsetri.

4. gr.

Skipan og hæfi

- 4.1. Aga- og úrskurðarnefnd KSÍ skal skipuð formanni og tveimur varaformönnum, sem skulu allir löglærðir, og auk þeirra fimm mönnum. Skulu þeir kosnir á

knattspyrnuþingi til tveggja ára í senn.

- 4.2. Nefndin starfar samkvæmt reglugerð þessari og skulu a.m.k. þrír nefndarmenn taka þátt í ákvörðun nefndarinnar og skal a.m.k. einn þeirra vera formaður eða varaformaður. Formaður ákveður nánar verklag.
- 4.3. Nefndarmaður er vanhæfur að fara með mál ef:
 - 4.3.1. Hann er aðili máls eða fyrirsvarsmáður aðila.
 - 4.3.2. Hann hefur gætt hagsmuna aðila varðandi efni málsins eða veitt aðila leiðbeiningar um það, umfram skyldu.
 - 4.3.3. Hann hefur borið eða verið kvaddur til að bera vitni um atvik málsins af réttmætu tilefni eða verið mats- eða skoðunarmaður um efni málsins.
 - 4.3.4. Hann er eða hefur verið maki aðila, skyldur eða mægður aðila í beinan legg eða tengdur aðila með sama hætti vegna ættleiðingar.
 - 4.3.5. Hann tengist eða hefur tengst fyrirsvarsmanni eða málflytjanda með þeim hætti er segir í 4.3.4.
 - 4.3.6. Hann tengist eða hefur tengst vitni í málinu með sama hætti og segir í 4.3.4.
 - 4.3.7. Fyrir hendi eru önnur atvik eða aðstæður sem eru fallnar til þess að draga óhlutdrægni hans með réttu í efa, m.a. ef hann eða náinn skyldmenni eru félagsbundin aðila máls eða hann vanhæfur af öðrum ástæðum.
- 4.4. Stjórn KSÍ skal skipa nefndarmann í aga- og úrskurðarnefnd til meðferðar einstaks máls ef tilskilinn fjöldi næst ekki úr kjörnum nefndarmönnum vegna vanhæfis þeirra.

II. kafli. MÁLSMEÐFERÐARREGLUR

5.gr.

Almennar málsmeðferðarreglur

- 5.1. Málsmeðferðarreglur samkvæmt reglugerð þessari skiptast í tvennt eftir því hvort um agamál er að ræða eða kærúmál vegna meintra brota á lögum og reglugerðum KSÍ.
- 5.2. Aga- og úrskurðarnefnd heldur fundi að jafnaði einu sinni í viku og skulu öll mál tekin fyrir á næsta fundi eftir að þau berast. Ef brýn nauðsyn krefur getur nefndin haldið fundi til úrslausnar einstakra mála. Einnig er heimilt að kalla nefndina saman, ef ætla má að mati dómsformanns, að kveðinn hafi verið upp rangur úrskurður vegna villandi eða rangra upplýsinga í skýrslu dómara og/eða eftirlitsmanns, eða þegar mót eða úrslitakeppni margra liða er leikin á einni helgi.
- 5.3. Nefndin getur ávallt í öllum málum óskað eftir skriflegum athugasemdum frá Knattspyrnusambandi Íslands eða öðrum þeim er málið getur varðað.
- 5.4. Aðila máls fyrir aga- og úrskurðarnefnd er heimilt að fela umboðsmanni að gæta hagsmuna sinna fyrir nefndinni. Telji nefndin að hætta sé á að málsstaður einhvers málsaðila verði fyrir tjóni vegna þess að hann er ekki fær um að koma sínum sjónarmiðum að í málinu, getur formaður hennar tilkynnt slíkt til framkvæmdastjóra KSÍ sem getur þá skipað slíkum aðila talsmann í viðkomandi máli.

6.gr.

Agamál

- 6.1. Aga- og úrskurðarnefnd úrskurðar um þau atriði, sem fram koma í atvikaskýrslum

dómara og/eða eftirlitsmanna KSÍ í leikjum í Íslandsmóti, bikarkeppni, meistarakeppni svo og innanhússmótum KSÍ. Jafnframt úrskurðar nefndin um önnur mál sem framkvæmdastjóri KSÍ eða aðrir, sem til þess hafa heimild, beina til nefndarinnar eða nefndin telur ástæðu til að hafa afskipti af vegna knattspyrnuleikja sem fram fara á Íslandi enda fjalli ekki aðrir um þau.

- 6.2. Leikmaður, þjálfari eða forráðamaður liðs sem fær brottvísun hefur heimild til að gera skriflega athugasemd við brottvísunina til aga- og úrskurðarnefndar innan sólarhrings frá því að leik lýkur. Viðkomandi skal fá afrit gagna og koma með sínar athugasemdir strax eða innan þeirra tímamarka sem aga- og úrskurðarnefnd setur honum. Athugasemd þessi kemur ekki í veg fyrir að sá sem í hlut á fái sjálfkrafa leikbann, en getur haft áhrif varðandi þvingingu refsingar þegar mál er úrskurðað.
- 6.3. Það er grundvallarregla að myndbandsupptökur skulu ekki notaðar við ákvörðun viðurlaga vegna agabrota. Ef það er hins vegar mat nefndarinnar að fyrirbyggjandi gögn séu ófullnægjandi eða misvísandi sem grundvöllur er nefndinni heimilt að styðjast við myndbandsupptökur.
- 6.4. Nefndin getur orðið við kröfu aðila að um málsmeðferð agamála fari eftir reglum um kærumál þegar og ef mál eru alvarlegs eðlis og geta varðað þvingstu viðurlög. Skrifleg krafa um slíkt skal berast nefndinni innan sólarhrings eftir umræddan atburð og tekur nefndin ákvörðun um kröfu aðila. Fallist nefndin á slíka kröfu skal málið fara í flýtimeðferð skv. grein 7.6. Fallist nefndin ekki á að meðferð málsins fari skv. meðferð kærumála, eins og við getur átt, úrskurðar nefndin samkvæmt fyrirbyggjandi atvikaskýrslum skv. grein 6.1. Um áfrýjun fer skv. grein 15.2.

7.gr.

Kærumál

- 7.1. Einstaklingur og/eða félag, sem misgert er við og hefur hagsmuni af meintu broti hefur rétt til að leggja fram kæru til aga- og úrskurðarnefndar KSÍ. Aðila sem hefur kærurétt er heimilt að beina þeirri kröfu til nefndarinnar að hann verði aðili máls og skal slík krafa koma fram eigi síðar en við aðalflutning málsins.
- 7.2. Kæra til nefndarinnar skal vera skrifleg, undirrituð af aðila máls eða umboðsmanni hans, berast nefndinni ásamt fylgigögnum í 4 eintökum og fullnægja eftirfarandi skilyrðum:
 - 7.2.1. Nafn kæranda, kennitala, heimilisfang, símanúmer, faxnúmer og netfang.
 - 7.2.2. Nafn kærða, kennitala, heimilisfang, símanúmer, faxnúmer og netfang.
 - 7.2.3. Nafn fyrirvarsmanns kæranda og kærða ásamt ofangreindum upplýsingum.
 - 7.2.4. Skýr kröfugerð.
 - 7.2.5. Lýsing helstu málavaxta.
 - 7.2.6. Tilvísun til þeirra laga og reglugerða, sem byggt er á í málinu.
 - 7.2.7. Lýsing á helstu röksemdum.
 - 7.2.8. Lýsing á helstu gögnum er fylgja kæru.
 - 7.2.9. Upptalning á vitnum, sem kærandi óskar að kalla til skýrslutöku.
- 7.3. Mál telst höfðað þegar kæra berst skrifstofu KSÍ og á kærandi rétt á staðfestingu á móttöku. Áður en málið er lagt fyrir næsta fund skal formaður nefndarinnar taka afstöðu hvort einhverjir formgallar séu á kæru sem varði frávísun með úrskurði. Verði málinu ekki vísað frá vegna formgalla skal það lagt fyrir á næsta fundi aga- og úrskurðarnefndar KSÍ til efnislegrar meðferðar.

- 7.4. Nefndin skal senda kærða (varnaraðila) án tafar og með sannanlegum hætti kæru og fylgigögn ásamt áskorun um að halda uppi vörnum í málinu. Kærða skal gefinn allt að 7 daga frestur til að skila greinargerð í málinu og skal hún fullnægja sömu kröfum og fram koma í grein 7.2., eftir því sem við getur átt.
- 7.5. Þegar öll gögn málsins hafa borist nefndinni skal nefndin taka ákvörðun um hvort mál skuli í reynd flutt, þá munnlega eða skriflega, hvort taka skuli vitna- eða aðilaskýrslur fyrir nefndinni eða annað það sem taka þarf ákvörðun um varðandi málsmeðferð málsins eftir móttöku þess.
- 7.6. Telji dómsformaður augljóst við skoðun á kæru, að brotið hafi verið gegn lögum og reglugerðum KSÍ, getur hann ákvarðað flýtimeðferð máls. Þeirri kröfu er beint til varnaraðila að hann upplýsi innan sólarhrings hvort hann hyggst hafa varnir uppi í málinu og hverjar þær séu. Komi engar varnir fram eða þær bersýnilega tilgangslausar er heimilt að kveða upp úrskurð án tafar.

8.gr.
Frestir

- 8.1. Kæru vegna kærumála skulu berast aga- og úrskurðarnefnd KSÍ innan 5 daga frá því að atvik það, sem kært er bar við og skulu almennir frídagar ekki taldir þar með. Berist kærán eftir að tímamörk eru liðin vísar nefndin kærúnni frá.
- 8.2. Ef skýrsla dómara/eða eftirlitsmanns berst ekki til aga- og úrskurðarnefndar innan 3 daga eða hún verið póstlögð næsta virka dag eftir að leikurinn fór fram, er nefndinni heimilt að vísa viðkomandi máli frá.
- 8.3. Sé kærúmáli vísað frá vegna formgalla hefur kærandi þriggja daga frest til að leggja fram nýja og bættá kæru til nefndarinnar. Frestur telst byrja að líða þegar frávísun berst kæranda og almennir frídagar skulu ekki taldir með.

III. kafli. ÚRSKURÐIR AGA- OG ÚRSKURÐARNEFNDAR

9. gr.
Uppkvaðning úrskurða og gildistaka

- 9.1. Úrskurði nefndarinnar skulu kveðnir upp svo fljótt sem verða má eftir að gagnaöflun telst lokið og málið tekið til úrskurðar. Leitast skal við að kveða upp úrskurð innan viku frá því að málið var tekið til úrskurðar.
- 9.2. Úrskurðir aga- og úrskurðarnefndar skulu almennt taka gildi við uppkvaðningu þeirra eða eins og nánar greinir í úrskurðarorði. Úrskurðir nefndarinnar varðandi agamál taka hins vegar gildi kl. 12 á hádegi næsta föstudag frá birtingu þeirra. Óheimilt er að taka út viðurlög í agamálum áður en úrskurðir taka gildi, nema um sjálfkrafa leikbann sé að ræða. Úrskurður um þyngri refsingu vegna brottvísunar, þ.e. úrskurður um fleiri leiki í bann en kveðið er á um í grein 13.1.2. tekur ávallt gildi kl. 12 á hádegi næsta föstudag eftir uppkvaðningu úrskurðar.
- 9.3. Ef augljóst er, að kveðinn hafi verið upp rangur úrskurður varðandi agamál vegna villandi eða rangra upplýsinga í skýrslu dómara og/eða eftirlitsmanns eða rangrar/ófullnægjandi skráningar eða ef rangar upplýsingar hafa borist skrifstofu KSÍ, þá skal aga- og úrskurðarnefndin halda aukafund sbr. gr. 5.2. í reglugerð KSÍ um aga-og

úrskurðarmál, og leiðréttu úrskurð eða kveða upp nýjan. Sá úrskurður skal taka gildi á hádegi næsta dag eftir uppkvaðningu.

10. gr.
Efni úrskurða

- 10.1. Úrskurðir aga- og úrskurðarðanefndar í kærumálum og eftir því sem við á í agamálum skulu vera skriflegir og rökstuddir og skal eftirfarandi koma fram:
- 10.1.1. Hverjir séu aðilar máls.
 - 10.1.2. Kröfugerð og málavaxtalýsing.
 - 10.1.3. Helstu málsástæður og röksemdir málsaðila.
 - 10.1.4. Rökstuðningur og niðurstaða nefndarinnar.
 - 10.1.5. Sératkvæði minnihluta, ef um slíkt er að ræða.
 - 10.1.6. Greint frá heimild aðila til áfrýjunar og áfrýjunarfresti.
- 10.2. Úrskurðir skulu undirritaðir af þeim, sem þátt tóku í afgreiðslu viðkomandi máls. Afl atkvæða ræður úrslitum máls. Ef nefndin er ósammála um niðurstöðuna skal þess getið sérstaklega.

11. gr.
Birting úrskurða

- 11.1. Nefndin sendir málsaðilum staðfest endurrit úrskurða jafnskjótt og þeir hafa verið kveðnir upp með tölvupósti eða símbréfi til formanns knattspyrnudeildar/ráðs þess aðila, sem félagið hefur tilkynnt KSÍ um eða kæranda og kærða sem getið er í kæru og greinargerð. Áhætta af mistökum við afhendingu tölvupósts eða símbréfs hvílir alfarið á móttakanda.
- 11.2. Úrskurður nefndarinnar skal einnig birtur á heimasíðu KSÍ strax eftir uppkvaðningu hans.

IV. kafli. VIÐURLÖG OG REFSINGAR

12. gr.
Viðurlög í kærumálum

- 12.1. Aga- og úrskurðarnefnd KSÍ getur í úrskurðarorði auk efnisniðurstöðu m.a. kveðið á um eftirfarandi réttindi og skyldur aðila málsins:
- 12.1.1. Úrskurðað leik ógildann, látið endurtaka hann eða dæmt um úrslit hans.
 - 12.1.2. Svipt aðila rétti til að gegna trúnaðarstörfum innan knattspyrnuhreyfingarinnar (hefur ekki í för með sér missi almennra félagsréttinda eða keppnisréttar).
 - 12.1.3. Óhlutgengisúrskurður, sem veldur útilokun frá þátttöku í keppni innan knattspyrnuhreyfingarinnar, um stundarsakir eða ævilangt.
 - 12.1.4. Úrskurðað aðila til að greiða aðila kostnað vegna málsins telji nefndin málsgrundvöllinn tilefnislausan.
- 12.2. Nefndin getur beitt eftirfarandi viðurlögum:
- 12.2.1. Áminning
 - 12.2.2. Ávítur

- 12.2.3. Ákvarðað dagsektir gagnvart aðildarfélögum KSÍ, sem renna til KSÍ.
12.2.4. Ákveðið sektir á aðildarfélög KSÍ.
12.2.5. Aðrar þær refsingar er lög og reglugerðir KSÍ tiltaka og heimila.

13. gr.
Viðurlög við agabrotum

13.1. Viðurlög við agabrotum ákvarðast sem hér segir:

- 13.1.1. Leikmaður sem fær eftirfarandi fjölda áminninga á sama keppnistímabili skal úrskurðaður í leikbann sem hér segir:
- 4 áminningar – bann í 1 leik
 - 6 áminningar – bann í 1 leik
 - 8 áminningar – bann í 2 leiki
 - 10 áminningar – bann í 2 leiki
 - Hver áminning eftir það - bann í 2 leiki.
- 13.1.2. Leikmaður, sem vísað er af leikvelli einu sinni eða oftár á sama keppnistímabili, skal fara sjálfkrafa í leikbann í næsta leik eða næstu leikjum sem hér segir:
- 1. brottvísun –sjálfkrafa bann í 1 leik
 - 2. brottvísun – sjálfkrafa bann í 2 leiki
 - 3. brottvísun – sjálfkrafa bann í 3 leik
 - 4. brottvísun – sjálfkrafa bann í 4 leiki, o.s.frv.
- 13.1.3. Sé leikmanni vísað af leikvelli eftir að hann hefur hlotið áminningu, skal hann eingöngu hljóta refsingu í samræmi við brottvísunina, þ.e. áminningin fellur niður.
- 13.1.4. Sé leikmanni vísað af leikvelli fyrir ofsalega framkomu, alvarlega grófan leik eða aðra grófa óþróttamannslega framkomu, skal refsa honum með leikbanni allt að 6 leikjum.
- 13.1.5. Aga- og úrskurðarnefnd er heimilt að setja leikmann í tímabundið keppnisbann í öllum aldursflokkum, ef um alvarlegt eða ítrekað brot er að ræða.
- 13.2. Viðurlög aga- og úrskurðarnefndar í agamálum skal afplána í leikjum í Íslandsmóti, bikarkeppni og meistarakeppni KSÍ nema annað sé tekið fram. Viðurlög við brotum í innanhússknattspyrnu skal fara með skv. grein 13.10. og viðurlög varðandi keppni í 7 manna liðum skal fara með skv. grein 13.11.
- 13.3. Agabrot framið á einu keppnistímabili hefur ekki ítrekunaráhrif á því næsta. Ef leikmaður á eftir að taka út agaviðurlög þegar keppnistímabili lýkur, skal það gert í byrjun næsta keppnistímabils viðkomandi leikmanns. Ofangreint nær aðeins til agaviðurlaga vegna brottreksturs en ekki vegna áminninga. Flytjist leikmaður á milli aldursflokka um áramót, skal hann taka út viðurlögin í nýjum aldursflokk.
- 13.4. Þegar leikmaður hefur heimild til að leika með tveimur eða fleiri aldursflokkum á sama keppnistímabili, skal hann taka út viðurlög í þeim aldursflokk, þar sem hann hefur unnið til þeirra, þ.e. brot í hverjum einstökum aldursflokk skulu meðhöndlast sérstaklega. Í þessu sambandi greinist 1. aldursflokkur í meistaraflokk, U23 og 1. flokk og aðrir aldursflokkar í a og b lið og skal fjalla um brot sérstaklega í hverju keppnisliði fyrir sig.
- 13.5. Þegar félag sendir fleiri en eitt lið til keppni í sama mótið skal leikmaður taka út

refsingu sína með öllum liðum félagsins í mótum í sama aldursflokki sbr. þó 13.4.

- 13.6. Ef þjálfari eða forystumaður liðs sem er á leikskýrslu er áminntur af dómara eða vísað frá leikvelli, skal viðurlögum beitt eftir sömu reglum og gilda um leikmenn, þar sem þær eiga við.
- 13.7. Þjálfari eða forystumaður sem tekur út leikbann og mætir á leikstað skal vera meðal áhorfenda frá og með einni klukkustund fyrir leik og þar til dómara hafa gengið til búningsklefa að leik loknum. Á því tímabili má viðkomandi ekki vera á leikvelli, í búningsherbergjum eða annars staðar þar sem hann getur verið í tengslum við lið sitt. Ef leikmaður, sem jafnframt er þjálfari annars liðs, er úrskurðaður í leikbann, er honum heimilt að stjórna liði sínu á því tímabili, sem hann tekur út leikbann sem leikmaður.
- 13.8. Ef leikmaður, sem jafnframt er þjálfari liðsins, er úrskurðaður í leikbann, er honum óheimilt að stjórna liðinu í þeim leikjum sem hann tekur út leikbann í.
- 13.9. Til viðbótar fyrirnefndum viðurlögum getur aga- og úrskurðarnefnd beitt eftirfarandi refsingum:
- 13.9.1. Brot samkvæmt ákvæðum 13. gr. geta varðað sektum allt að fjárhæð kr. 50.000 í meistaraflokki og kr. 20.000 í öðrum aldursflokkum. Sama gildir ef þessir aðilar verða uppvísir að óþrúðmannlegri framkomu.
- 13.9.2. Aðildarfélag sem fær sjö eða fleiri refsistig í sama leiknum, þar sem áminning er 1 refsistig og brottvísun 4 refsistig, skal sektað um kr. 2.000 í leikjum í meistaraflokki fyrir hvert refsistig umfram 6, en kr. 1.000 fyrir leiki í öðrum flokkum.
- 13.9.3. Aðildarfélag sem yfirgefur leikvöll í mótmælaskyni eða neitar að halda áfram leik má refsast með brottrekstri úr keppni, stigatapi, leikbanni á öllum leikmönnum liðsins og/eða sekta um allt að kr. 100.000.
- 13.9.4. Ef forystumaður aðildarfélags, sem ekki er á leikskýrslu eða áhorfandi gerast sekir um vítaverða eða hættulega framkomu gagnvart leikmönnum, dómurum, þjálfurum eða öðrum er heimilt að sekta viðkomandi aðildarfélag um allt að kr. 50.000. Ef brot telst alvarlegt eða um ítrekun er að ræða er auk þess heimilt að setja viðkomandi lið í heimaleikjabann, þar til öryggi leikmanna, þjálfara og annarra telst tryggt.
- 13.9.5. Brot skv. tilkynningu framkvæmdastjóra KSÍ sbr. 19. grein hefur í för með sér refsingu eftir eðli brotsins, sekt að fjárhæð kr. 50.000 en þó ekki lægri en kr. 25.000 og/eða leikbann í tiltekinn fjölda leikja eða tímabundið.
- 13.9.6. Aðrar refsingar sem lög og reglugerðir KSÍ tiltaka og heimila.
- 13.10. Refsingar takast út í innanhússmótum (sem leikin eru skv. reglugerð KSÍ um innanhússknattspyrnu) á þann hátt, að hafi leikmaður hlotið tvö gul spjöld í viðkomandi móti, skal hann fara sjálfkrafa í leikbann í næsta leik og svo í sjálfkrafa eins leiks bann fyrir hver tvö gul spjöld þar á eftir í mótinu. Fyrir brottrekstur skal hann fara sjálfkrafa í leikbann í næsta leik og fyrir brottrekstur í annað sinn í mótinu skal hann fara sjálfkrafa í tveggja leikja bann o.s.frv. Hafi dómari vísað leikmanni af leikvelli fyrir ofsalega framkomu, alvarlega grófan leik eða aðra grófa óþróttamannslega framkomu, skal aga- og úrskurðarnefnd úrskurða leikmanninn í frekara leikbann. Viðurlög skulu ekki flytjast á milli innanhússmóta. Viðurlög vegna leikja í Íslandsmóti, bikarkeppni og meistarakeppni KSÍ verða ekki tekin út í innanhússmótum.
- 13.11. Áminningar og brottvísanir eru ekki skráðar á leikskýrslu í keppnum í 7 manna liðum og brottvísun gildir aðeins í viðkomandi leik og hefur ekki í för með sér frekara keppnisbann nema að um sé að ræða mjög alvarlegt atvik sem dómari skal þá gefa

aga- og úrskurðarnefnd skýrslu um.

14.gr.
Leyfiskerfi KSÍ

14.1 Aga- og úrskurðarnefnd KSÍ ákveður viðurlög við einstökum brotum á leyfiskerfi KSÍ að fengnum viðeigandi upplýsingum frá leyfisstjórn, sbr. það sem fram kemur hér í greininni.

14.2 Eftirfarandi refsíákvæði eiga við um Leyfiskerfi KSÍ:

14.2.1 Starfsnefndir og ráð.

Einstaklingar, sem eru í starfsnefndum eða ráðum sem tengjast leyfiskerfinu, eða hafa tekið að sér að vinna ákveðin verkefni fyrir leyfisstjórn og brjóta þann trúnað, sem þar er kveðið á um, skulu hljóta áminningu frá KSÍ og víkja úr öllu starfi, nefndum og ráðum sem tengjast leyfiskerfinu.

14.2.2 Tímamörk ekki uppfyllt.

Ef leyfisumsækjandi uppfyllir ekki sett tímamörk um framlagningu leyfisgagna skal hann sæta viðurlögum. Við ákvörðun þeirra skal taka mið af því hve alvarlegt brotið er. Eftirfarandi viðurlögum er hægt að beita:

- Viðvörðun og sekt; við fyrsta brot skal beita dagsektum að upphæð kr. 2.500 fyrir hvern dag sem líður þangað til viðeigandi gögnum hefur verið skilað, að hámarki kr. 50.000.
- Áminning og sekt; við ítrekað brot skal beita dagsektum að upphæð kr. 5.000 fyrir hvern dag sem líður þangað til viðeigandi gögnum hefur verið skilað, að hámarki kr. 100.000.
- Stigatap; við alvarlegt og ítrekað brot er jafnframt heimilt að draga allt að 3 stig frá félaginu í deildarkeppninni.

Ítrekunarkvöð fellur niður ef tímamörk hafa verið uppfyllt í 3 ár samfleytt.

14.2.3 Röng leyfisgögn.

Félag, sem verður uppvíst að því að hafa lagt fram röng eða fölsuð gögn/skjöl með umsókn um þáttökuleyfi, skal sæta viðurlögum. Við ákvörðun þeirra skal taka mið af því hve alvarlegt brotið er. Eftirfarandi viðurlögum er hægt að beita:

- Viðvörðun og sekt, að upphæð allt að kr. 100.000.
- Áminning og sekt, að upphæð allt að kr. 200.000.
- Stigatap; ef brotið telst alvarlegt og vísitandi er jafnframt heimilt að draga allt að 6 stig frá félaginu í deildarkeppninni.
- Afturköllun þáttökuleyfis; við mjög alvarlegt og ítrekað brot getur KSÍ afturkallað þáttökuleyfi félagsins í deildinni, og hefur þar með heimild til að vísa félaginu úr deildinni til loka keppnistímabilsins. Jafnframt getur félagið ekki tekið þátt í Evrópukeppni. Félag, sem hefur verið vísað úr deild til loka keppnistímabils, skal leika einni deild neðar að ári.

14.2.4 Forsendur sem leiða til viðurlaga ef þær eru ekki uppfylltar.

Ef forsenda er ekki uppfyllt, sem er skilgreind þannig að slíkt leiðir aðeins til viðurlaga, sbr. greinar 16.2 og 16.3 í Leyfisreglugerð KSÍ, skal taka mið af eftirfarandi viðurlögum:

- Fyrsta skipti, viðvörðun.
- Annað skipti, áminning og sekt að upphæð allt að kr. 50.000.
- Eftir það, áminning og sekt að upphæð allt að kr. 100.000.

Ítrekunarkvöð fellur niður ef forsendan hefur verið uppfyllt í 3 ár samfleytt.

14.2.5 Frekari viðurlög.

Frekari viðurlög geta átt við í sérstökum tilfellum, eins og að skylda félag til að senda réttindalausn þjálfara á þjálfaranámskeið til að afla sér tilskilinna réttinda innan ákveðinna tímamarka, o.s.frv.

V. kafli. ÁFRÝJUN

Áfrýjun til áfrýjunardómstóls KSÍ

- 15.1. Heimilt er að áfrýja til áfrýjunardómstóls KSÍ öllum úrskurðum aga- og úrskurðarnefndar í kærumálum.
- 15.2. Almennt verður úrskurðum nefndarinnar í agamálum ekki skotið til áfrýjunardómstóls KSÍ nema í eftirfarandi undantekningartilfellum:
 - 15.2.1. Úrskurði nefndarinnar um þriggja leikja bann eða þyngri refsingu.
 - 15.2.2. Úrskurði nefndarinnar um viðurlög og refsingar sem nema hærri fjárhæð en 25.000,-.
 - 15.2.3. Úrskurði nefndarinnar á grundvelli greinar 13.9.3.
 - 15.2.4. Úrskurði nefndarinnar um heimaleikjabann á grundvelli 13.9.4.
- 15.3. Frestur til að áfrýja máli til áfrýjunardómstóls KSÍ skal vera 5 dagar frá því að úrskurður aga- og úrskurðarnefndar er kveðinn upp og skulu almennir frídagar ekki taldir með.
- 15.4. Um meðferð áfrýjunarmála fyrir áfrýjunardómstól KSÍ fer að öðru leyti eftir lögum KSÍ og reglugerð KSÍ um áfrýjunardómstól KSÍ.

16. gr.

Áfrýjun til áfrýjunardómstóls ÍSÍ

- 16.1. Heimilt er að áfrýja til áfrýjunardómstóls ÍSÍ þeim málum áfrýjunardómstóls KSÍ, sem hafa almennt gildi fyrir íþróttahreyfinguna í heild sbr. nánar reglugerð KSÍ um áfrýjunardómstól KSÍ.

17. gr.

Endanleg niðurstaða

- 17.1. Úrskurður aga- og úrskurðarnefndar KSÍ um ágreiningsefni sem ekki verður skotið til áfrýjunardómstóls KSÍ er endanlegur og bindandi fyrir málsaðila. Verður þeim úrskurðum ekki skotið til áfrýjunardómstóls KSÍ eða annarra dómstóla innan íþróttahreyfingarinnar. Jafnframt skuldbinda aðilar sig til að skjóta ágreiningi, sem úrskurðað hefur verið um af aga- og úrskurðarnefnd KSÍ, ekki til almennra dómstóla.

VI. kafli. ÝMIS ÁKVÆÐI

18. gr.

Fundargerðabók/úrskurðabók

- 18.1. Í fundargerðabók skal færa meginefni þess, sem fram kemur á fundum nefndarinnar. Endurrit úr fundargerðabók má afhenda þeim, sem hefur lögvarinna hagsmuna að gæta, en skal að jafnaði ekki birt almenningi.
- 18.2. Nefndin skal einnig halda sérstaka úrskurðarbók, sem hefur að geyma úrskurði hennar. Úrskurðarbók skal vera aðgengileg og birt á heimasíðu KSÍ.

19. gr.
Ósæmileg framkoma

- 19.1. Framkvæmdastjóra KSÍ er heimilt að vísa til aga- og úrskurðarnefndar atvikum sem skaðað geta ímynd knattspyrnunnar eða þeirra sem þátt taka í leiknum. Slík atvik hafa þá ekki komið fram í atvikaskýrslum dómara og/eða eftirlitsmanns á leiknum en geta verið hvers kyns ósæmileg framkoma á leikstað eða á annan hátt opinberlega.
- 19.2. Framkvæmdastjóri KSÍ skal skila greinargerð til nefndarinnar ásamt gögnum máli sínu til stuðnings og skal fara með slík mál eins og um kærumál sé að ræða, eins og við getur átt.

20. gr.
Lyfjaeftirlit

Mál vegna meintrar lyfjamisnotkunar íþróttamanna skal farið með samkvæmt reglugerð ÍSÍ um lyfjaeftirlit.

21. gr.
Niðurfelling refsingar

Knattspyrnuþing er heimilt með minnst 2/3 greiddra atkvæða að fella niður refsingu eða veita úrskurðuðum aðila full réttindi að nýju innan knattspyrnuhreyfingarinnar.

22. gr.
Önnur ákvæði

- 22.1. Aga- og úrskurðarnefnd KSÍ setur sér nánari starfsreglur sem samþykktar skulu af stjórn KSÍ.
- 22.2. Agareglur FIFA (FIFA Disciplinary Code) eru ákvæðum þessarar reglugerðar til fyllingar, eftir því sem við á.

23. gr.
Gildistaka

- 23.1. Reglugerð þessi er sett með stoð í 18. grein laga KSÍ og öðlast þegar gildi samkvæmt sömu grein. Við gildistöku hennar falla úr gildi starfsreglur aganefndar KSÍ og lög um dómstóla KSÍ.

Samþykkt af stjórn KSÍ 23. apríl 2007 með síðari breytingum